



8 OGOS 2015

KENYATAAN MEDIA
MENTERI PEMBANGUNAN WANITA, KELUARGA DAN MASYARAKAT

"MASALAH SOSIAL DI KALANGAN KANAK-KANAK"

Saya berasa amat terkejut, sedih dan kecewa dengan masalah sosial yang semakin menjadi-jadi kebelakangan ini. Setiap hari dalam minggu ini, akhbar melaporkan kes hubungan terlarang kanak-kanak bersama teman lelaki terbongkar apabila kanak-kanak didapati sehingga melahirkan anak. Kejadian kanak-kanak berusia 15 tahun di Kuantan, Pahang yang melahirkan bayi tanpa diketahui mengandung hanya disedari apabila kanak-kanak pada mulanya mengadu sakit perut.

Dalam kes yang lain berlaku baru-baru ini melibatkan kanak-kanak berumur 11 tahun dari Jempol, Negeri Sembilan juga didapati melahirkan anak di sebuah klinik swasta di Bahau apabila pada mulanya tujuan ke klinik adalah kerana kanak-kanak mengadu sakit perut.

Keprihatinan dan sikap lebih berwaspada oleh ibu bapa dan keluarga haruslah dititik beratkan dalam menangani hal seperti ini. Saya menyarankan agar ibu bapa, penjaga dan masyarakat supaya lebih memberi keutamaan kepada penjagaan kanak-kanak agar perkara yang tidak diingini seperti ini dapat dielakkan. Ibu bapa dan penjaga harus lebih peka dengan siapa anak-anak mereka bergaul. Cubalah untuk menjadi rakan kepada anak-anak agar mereka tidak terasa hilang kasih sayang dan sentiasa merasakan tiada halangan untuk mereka berkongsi segala suka dan duka bersama ibu bapa dan keluarga sendiri.

Kementerian melalui Jabatan Kebajikan Masyarakat (JKM) akan memberi bantuan dan sokongan dalam pelbagai aspek demi kebajikan kanak-kanak tersebut yang mungkin belum lagi bersedia untuk menjalankan tanggungjawab sebagai seorang ibu. Sekiranya perlu, kaunselor yang bertauliah akan dihantar ke rumah secara berperingkat untuk membantu memberi khidmat nasihat kepada kanak-kanak dan juga keluarga.

YB DATO' SRI ROHANI ABDUL KARIM
MENTERI PEMBANGUNAN WANITA, KELUARGA DAN MASYARAKAT